

Hefe di Seccion Surveillance, sr. Richard Martus

Polis lo hiba un control severo durante paradanan di carnaval!

ORANJESTAD (AAN) -- Hefe di Seccion Surveillance di Oranjestad, señor Richard Martus, a worde entrevista pa DIARIO, entorno di e control extra cu polis ta bay tin durante e dianan di carnaval cu ta den porta.

Señor Martus a bisa cu carnaval ta algo di pueblo, y cu ta un tarea conhunto di un y tur pa e bay bon, pa asina na final di carnaval por bisa cu henter e pueblo di Aruba a contribui pa e bay bon.

E funcionario a señala cu ta importante pa nos tur tin respet pa otro, pasobra esey ta contribui pa e carnaval bay na e manera mehor posible.

Refiriendo na nos hubentud, señor Martus a bisa cu nan ta e futuro di Aruba, y pesey ta importante pa nan sa cu "mañan ta cuminza awe", y cu loke bo ta haci awe tin consecuencia den bo futuro, mañan.

Importante ta, e funcionario policial a bisa, pa e hobennan cuida nan curpa hopi bon, loke den e sentido mas amplio di e palabra kiermen tene cuenta cu consecucionan di bebemento di alcohol, consumo di droga, practica sexual, bringamento, etc.

Señor Martus a acentua cu mayoria di biaha hopi acento ta worde pone riba muchanan muher, mientras cu muchanan homber tambe tin e mesun responsabilidad pa cu e mucha muher cu ken nan tin cierto relacion cune.

El a haya hopi bon cu ayera atardi 6'or nan a pasa un programa den television riba tereno di sexualidad, ya cu nos hobennan mester tene cuenta cu esey.

Señor Martus ta haya cu carnaval no ta pa haci cosnan unda cu razonamento ta keda un banda.

CONTROL POLICIAL:

Encuanto e trabao di polis durante Carnaval, señor Martus a declara cu e control policial lo sigui mescos cu e dianan cu a pasa, cu tabata tin actividad carnavalesco na San Nicolas. E mesun ritmo ey lo sigui, manera control riba careteranan pa e trafico circula di e forma mas sigur posible, y lo pone hopi atencion na vigilancia riba estacionamento di auto di e publico cu ta bay wak e carnaval, pa nan propiedad keda mas safe posible.

Polis lo ta atento tambe pa bringamento cu por surgi riba

caminda y riba e punto aki den nomber di Cuerpo Policial, señor Martus a haci un yamado na nos pueblo en general y hubentud en particular, pa bao nan mesun responsabilidad cosnan asina no tuma lugar.

Pa loke ta trata bringamento provoca entre hobennan, e funcionario a bisa cu tin ningun motibo pa bringa, pues den diferente ocasion el a conversa cu hobennan envolvi y nan mayornan y ora di

puntra ta kico ta e problema, no por a saca afo kico ta e causa y no ta mira razon pa e bringamento ey.

Ta gewoon gang cu gang cu ta bringa cu otro, y pesey e ta haci un yamado na hobennan pa no haci esey.

Polis ta prepara pa actua si tin cualquier eventualidad, y e ta spera cu mayornan lo papia cu nan yiunan pa nan comporta nan mes manera mester ta.

